

Actividad deportivo durante bishita Real



ORANJESTAD -- Manera ta conoci, Pareha Real lo ta di bishita riba nos dushi isla Aruba dianan 20 y 21 di November proximo. Tin algun tema cu ta central durante di e bishita Real, un di e elementonan importante ta e asina yama: “mira y wordo mira”.

Riba diahuebs 21 di november lo bay tin un mainta prepara cu actividadnan di deporte y wega. E intencion ta pa laga tur alumno di scolnan basico na Aruba bini hunto den Stadion Guillermo Prospero Trinidad na Dakota y eynan pasa un rato ameno hunto y gosa di e actividadnan deportivo cu a ser prepara pa nan.

Importante ta e participacion di e muchanan, pues e lo ta un fiesta deportivo pa tur mucha, y tambe pa es nan cu limitacion como tambe scolnan special.

Una bes den stadion tur mucha hunto lo saluda e Pareha Real pa di e manera aki crea un recuerdo colectivo. Aki cuarenta aña ainda nan por bisa: “Na aña 2013 ora cu e Rey y Reina tabata na Aruba,

ami tambe tabata presente den stadion”. Despues di a haya e oportunidad di saluda e Pareha Real, e actividadnan deportivo ta inicia unda tin chens cu nos Rey y Reina lo cana y pasa cerca e participantenan.

Pa e dia di actividad Deporte y Wega nos muchanan ta haya un T-shirt special traha cu e simbolo di e shoco di Aruba yama Shoco Prins!. Den curso di otro siman e T-shirtnan lo yega Aruba y lo wordo reparti pa e scolnan participante na e evento aki.

E programa di e bishita, hinca den otro despues di varios consulta, specialmente pensando con Aruba lo por saca su miho cara pa nos monarca nobo, a scoge pa un contenido cu no solamente ta un parti di e cadena di e programa, sino cu e ta cuadra cu e totalidad di e meta pa laga e Pareha Real cera conoci cu Aruba y su habitantenan. Na mesun momento mustrand e monarca con e pais ta enfrenta su futuro.

Pa mas informacion, agenda di dia y potretnan por bishita www.bishitareal2013.aw. □